

四庫全書

集部

欽定四庫全書

集部

雙溪集卷一至三

詳校官石中允臣薩敏

主事臣呂雲棟覆勘

總校官進士臣繆琪

校對官原任典簿臣郭祚熾

稽錄監生臣連彭年

欽定四庫全書

集部四

雙溪集

別集類三宋

提要

臣等謹案雙溪集十五卷宋蘇籀撰籀有樂城遺言已著錄考蘇黃二家並隸名元祐黨籍南渡以後黃氏雖承籍先澤頗見甄錄而家學殆失其傳惟其孫耆依附朱子之門得以挂名於語錄朱子於蘇氏兄弟攻擊如讐

而於廷堅無貶詞留之故也然留之著作惟
宋史藝文志載有復齋漫稿二卷世無其本
文獻通考已不著錄宋人亦無稱述者文章
一道殆非所長惟留以蘇轍之孫蘇遲之子
尚有此一集傳世為能不墮其家風獨是軾
轍之為偉人不僅以文章為重其立身本末
俱不愧古賢籀此集中乃有上秦檜二書及
庚申年擬上宰相書皆極言和金之利所以

歸美于檜者無所不至不免迎合干進之心
又雜著中別有進取策一本復力言攻劉豫
以圖金前後議論自相矛盾蓋皆揣摩時好
以進說小人反覆有愧于乃祖實多轉不如
黃齏之无咎无譽矣特其詩文雄快疎暢以
詞華而論終為尚有典型固亦未可遽廢焉
乾隆四十三年三月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

雙溪集卷一

宋 蘇籀 撰

古律

次韻大父曬麥

西郊歲種十畝麥自笑不耕惟坐食吾人一飽已天幸
此外何心更求得我田長熟無旱潦玉粒收來堅且好
豈同豪右執券契虐取多求急於盜我家治生無竒功
累世守此慈儉風倉困不滿非所恤冒暑一曬安敢慵

長空不見纖雲起
沽酒烹雞會鄰里
炎飈不厭塵滿身
冷餅行看冰上齒
閒居捨此一事無
狗時干祿姑捨諸
信知為農自足樂
秦相未必賢牽盧

大父令賦舊扇

裁紈當團扇當暑不離手
炎涼一推遷委擲昏塵垢
蒙縈蛛網闇闇迷遠岫
人情逐時移浪自分好醜
一朝被收錄已迫朱明候
開篋振浮埃清風亦生袖
有愛必有憎無新故無舊
可憐漢婕妤涕泣將為咎
賢哉楚令

尹無欣亦無詬

大父令賦捕魚

寒魚不樂水遇汕輒來依溪邊蓑笠翁智深魚莫知網
罟既不設釣竿亦罷攜蕭然徒手來一一收無遺幽人
買魚食心亦憐魚癡蚤知烹割苦寧如在流澌世人豈
異此外物常見羈好在李斯犬當觀莊子犧

咸陽縣令求清渭樓詩和何子應長句

秦如蒹葭未飽霜四維不舉空豪強神疲鬼乏赴功利

兆自襄公終始皇富極薰天力斡地諸侯西來誰敢當
范雎李斯乘利勢蒙鷲白起先戎行韓盧前奔宋鵲舉
角逐海內如驅羊干戈取之刑法治舉事夸淫惟快意
時移數盡非徒然直筆汗青遭唾毀咸陽宮殿無尺瓦
直抵南山是禾稼山巔冠闕總成塵清渭東流無晝夜
昔時此水貫宮垣今日淪漣縣樓下無復秦娥洗粧水
時有村童飲牛馬秋波泠泠泛紅葉春天波蕩桃花節
清名不與世榮辱混濁何嘗妨至潔八川分流皆異態

七澤胸中無芥蒂直須面面倚危欄
彈指雍州原野大樓中有客
雍門彈坐上悲歌擊樽壞何侯
精采如琳琅攜詩揖我謂我臧
我今為子登樓賦書版一諷悲興亡

次韻范氏子園居即事三首

媚蘭多畦畹黨竹論尺尋倦矣一枝足
卓哉千里心氣含湖海姿名掛羆虎林
長髯冒世累禿鬢微霜侵雕鑽久已休
潛伏恨不深亭丘近來趣何止如山陰

沼沚清漣生沄沄復浼浼爨清飯不足歡
賞心無餒金

絲撚條柯酥蠟滴
跌蕾櫻桃與芍藥
春事卜貞悔

花開且復謝
回首悲今昨
席月吹參差
臨芳傾鑿落
蒨蘋藉醉枕
風竹驚眠覺
賓僚上馬去
烏鳥相呼樂
春光在木杪
花絮相紛箔
酒到忘醇醕
客來無善惡

耕者得古玉指環一首

百世繁華墮劫灰
淒涼斷簪并擘釵
淑顏窈窕亦塵土
指環耕出田中來
野人辛勤務稼穡
兩手龜折闢草萊
未知此環竟安用
但訝光采尤竒瑰
王孫捉麈不辨玉

手面膏拭無纖埃柔荑纖纖擢紺袖五雲書勢高崔嵬
金撥收聲飫犀筋冰過紅牙誠妙哉指環不肯貧家售
東鄰女貧人道醜巧梳墮馬長掃眉五色絳鍼工組繡
古人製器知為誰今時豈乏春風手春葱銀甲深藏袖
偕老賦詩須我友

游寒谿次醅字韻題九曲亭一首

幅巾戲漉彭澤醅尺書間覓來禽栽東坡居士五年久
真主未遽求鹽梅扁舟夷猶水刻窟雙履秃缺峯嵒嵬

招揖西山與東魯迴首閭闔并玉臺標榜高靈方外景
不染時世毫端埃倚空千重翡翠蓋落日萬頃琉璃堆
興酣魚鳥安樂國喜溢僕馭陶家壘惜哉二老削舊跡
不論石上并牆隈碣岸橫舟昔時處刻劃獨免漫蒼苔
梵刹青蓮舊僧社徑遂幾合無人開方今九原如可作
足使四海無彫摧封章千載垂可否玉堂黃閣猶儋雷
精義窮神致實用不變生死無去來天下書生踐遺跡
崇蔭處處思賢哀

次韻荅晁以道見贈二首

骨髓緘藏萬古謀
畔牢愁思不禁秋
常憐屈宋鳴中古
不遇丘軻放一頭
文賦東坡推典麗
簡書西路失歸休
看公議論方游夏
豈數蘇州與柳州

玉井之泉汲又新
腐陳收拾已空囷
鐵牛城下三年眼
割見仇池社裏人

次韻范機宜感懷

珪組紛紛蟻慕羶
徇人可否冀超遷
傷哉遠畧疲中國

慟矣長星出巨天晉楚春秋書失國惠昭徒馭竟言旋
朝廷得士為強弱郭隗來歸不首燕

送王機宜歸襄陽侍下一首

乃公振旅來河湟新奏捷詩禮壯齋壇荆州初妥帖王
郎賦緇衣旦暮刷燕越從容挽六鈞邂逅記三篋賞竒
必先覩語怪尤欣愜樵徑曳斑杖僧窗敷白氎解頤千
慮却爬癢衆賓厭轅門熊虎士鐵面竦長鬣椎牛赴大
醕割肉揮長鋏酸寒商公邑會我縈仕牒兒嗶羹不糝

女瘦裙剩摺嫉邪髮衝冠憂國鬚屢鑷侯家有美載寒
冬相煖熱僂褭帶青萍於菟包璫甲風磴好扶輪冰溪
多病涉淒涼熊耳下小雪輕塵浥升堂語君公浚治千
樓堞勉勉足兵食孜孜撫疲菘政成在簡易可大賢人
業

黃荃畫金盆鴿孟蜀屏風者也一首

孟氏觀闕嘗鮮新虬虬拱楠翔青冥可憐當年百事足
鬼眼未遽窺高明鋪首倉琅百樓聳寶簾珠帶關銀屏

風臺露榭敞錦纈朝朝暮暮吹竽笙鵝溪白繭冰雪清
黃史舐筆研丹青屏間觀者誠粲者醉頰融煖蘭膏勻
金槃滴取宮桃露點黠鉛朱三昧處融怡宿粉暈嬌紅
一片辭枝三月暮妙趣忘言心獨覩花好更教宮女妬
綵翎降趾戲宮廷啄哺馴和謝籠籞跖石窺盆刷羽儀
天樂鳳蕭騫欲舉智者創物仁者守何嗟及矣何追咎
當時高岸尚微茫零落萍蓬入誰手華堂粉壁倚义竿
五十年前亡是叟細說盈虧閱今古我曹知愛當知惡

此間風韻出成都
花上杜鵑啼最苦
見之坐石久彌新
咄咄庸工難與語

避地詠史一首

量力難貪督亢圖
馮亭致地旣來歟
摸金公子驅長戟
割地先生醉墮車
乘傳有人延劇孟
運籌何術困由余
鬼方政賴高宗克
雅信周公無逸書

東坡三絕句

門庭桃柳人人護
焚屋新遭盜跖餘
鄰社蕭條近尤劇

孫孫子子寶公書

嶺背泉甘陵谷遷危亭園顧尚依然春蘭秋菊無終古
地上居人世世賢

為文赤壁并黃坂奇韻平生想像中延目練江咨逝水
舉頭碧落看飛鴻

過故丞相呂汲公墳刹二首

元祐推諧弼乾坤豈小康曹參尚清淨蕭傅性剛方報
國無遺恨興邦舉舊章累年公議白名與日星光

纏綿思舊賦沈痛八哀篇宇宙門人盡謀謨國史傳高
閔人莫及何代獨無賢欲說源流遠還應筆似椽

南溪太息一首

東坡曾賞南溪雪他日流芳好事孫寒侵稜稜裹崧岱
憂端憤憤塞乾坤赤囊政爾勞邊吏白羽多應落酒樽
太息九原何可作逸才誰敢賦招魂

舟中懷古一首

耀德先王不耀兵汪洋施澤在生靈孰違天戒并民欲

不愛邦家嗜虜庭，作俑亂生誠有自。
覆車勢合亦難停，山河異境傷王導。
雲海高翔羨管寧，願以絲毫裨漢室。
豈無弓矢斃胡星，愚翁事業空遺臭。
經義分明戰血腥。

次韻陳叔易遠別離三首

晝短宵未明，何朝妾覲君。
淚滴九霄雨，愁凝千古雲。
鳳藏丹霄晚，鴻遵沙磧遠。
樓迴眼波窮，軸折離魂斷。
安得葛陂龍，肉骨丹九轉。

婦慧弗諳事，謂世無離索。
洋洋舊依蒲，逐逐難翳藿。
衝

風遞弱羽爛漫何鄉落憂端埒南山那堪魯酒薄人力
末如何天公良可託

別情茶無苦訣語若為道日近長安遙山圍煙浪遶星
河通故都冰雪迫彫檣迴轅尚茫茫延頸空矯矯卜歸
付乾策此策何人抱

憶雍都一首

秦漢西都誰復加茂陵賦筆大非夸西瞻周道平如砥
南揖秦山翠削瓜電尾風髮蹠逸健蝟髯鰲面手高叉

兵微將乏初無奈賊破功成近可嘉飄泊荆吳最蕭瑟
厭聞胡漢更紛拏娛賓北榭忘憂酒侍燕西川沒骨花
縱被尊羹當羊酪未諳艫舫憶驪駟

梔子花一首

鏤裁雪羽元同質合輯龍沈更一家氣襲禪僧鼻端白
葩敷溪女鬢脣斜牽纏薜色誠虛幻結習因緣可歎嗟
芍藥調和傳漢殿醑醲脂澤有渾耶

鑒裁一首

喬公評老瞞謫仙奇郭令視遠數十載偉歟真智聖破
賊此郎子勿反吾同姓凡才恩世間鑒裁惟其證大奸
初難辨明者獨深省若人與斯評厥重如鐘鼎紛紛女
媧土安在所譏病惟賢則知賢絲亂行將整掩書坐前
軒老眼安敢瞑

夜飲一首

微生無限死之徒瓦解絲縲不易圖一簣區區裨大壞
力行踴躍競長途韜鈴籌策皆摧折文籍條綱總濶疎

誰料孟嘉為謝傅笑觀蔣幹待周瑜

維摩詰一首

孟杓何人執其咎脅脅卑卑十年臭邂逅瓊枝解渴
心京洛豈嘗開豆蔻博山沈水燒春晝採英擷萼春
風手九迴蠶卷紆餘秀尺六仙圍楚宮瘦癡狂無限
熱肝脾盛說櫻桃比垂柳槁木寒灰不二門禪功道
力何妍陋

偶成二絕

古風未必今人操老氣休祈大吏歡捫腹定無竒士術
蕭然且作野人看

延陵乃有能詩鑒子路猶為少讀書習氣未忘番簡冊
白頭稽古不應愚

梅雨一首

柑花銷殞荔殊小海上雨雲氛氣昏感慨干戈異鄉客
愁思骨肉與誰論白魚紫笋清庖隸盧橘楊梅積市門
作吏天涯何所得一春黃卷伴芳樽

張孺人九十六歲簽判求眉壽堂詩二首

鵲巢流慶嗣如參鶴髮人間仰達尊經眼盡知三世事
含飴已看幾重孫承顏捧詔疏封邑扇枕溫床不倚門
取數西方無量佛滿堂氛馥貝多翻

蕭同叔子無令笑縣上之推乃棄官咸羨此堂稱聖善
累從治劇勸平反晨昏不怠諄諄誨僮使皆沾洩洩歡
紫詔又當稱大國安輿五馬疊榮觀

陋居一首

平生壘牖部茆菁江左那無寸土寧游宦飄然紆幕燕
陋居粗有讀書螢浮生佛脚須當抱亂世儒衣便欲停
天定災祥在淫善北溟安得勝南溟

羣盜一首

貪得不知義流風紊四維珪瓊實盲昏黥髡亦覬窺諒
非跖躄才競揭椎埋旗巨猶肆滔天小醜爭攘欺立國
計安出顧無以家為三州破竹勢吏卒傷撓隳越人竟
何能非復尉佗時壺篔迎王旅克捷劍之湄閩府幸宴

然一毫未嘗虧噫吾有以待致爾由他岐殘孽失追襲
諸將咸思歸勉哉方伯職力拯鄰邦危漳濱擘未解蜂
蝎生武夷姑息倒困藏諄復行文移近事苟目前遠憂
那敢知天運未太平佛力亦其微武夫勿告勞儒冠須
出奇知人與安民此責誠塞之

秋分一首

礎濕嵐昏近海多劍霜清刮手親磨輪困馬棧非難整
索漠牛衣且勿呵好住延陵臯澤去強同溱洧濟人過

坐令幽谷遷喬木盛論中原喻尉佗

余避亂謀
居吳中

范箕叟啜茗一首

無窮賞物胡名達希世織柔不計金愛雪并花也延命
擲絲與竹却知音情閒未絕毫釐念文艷何妨鐵石心
雅情樊蠻誦長恨飲茶亦可擬芳斟

程帥父朝議年八十餘諸人作詩褒咏次韻一
首

郎潛華首寤鑾輿連帥元戎十乘車吏道薛公何必問

史才倚相妙稱書雍容鳩杖朝裾偉談笑蒲鞭法網疎
萬石恬侯定非晚閩人安枕夢維魚

凍雨一首

淋淋凍雨滴春朝正月寒威倍凜慄汨淖不甘勞阜隸
執輿豈必勝芻蕘素餐致寇思長策失業疲氓想易招
馴伏強豪蘇餒乏濟時籌略直須超

贈蘇文瓘

推明能隼骨專車按地談天河洛圖漢魏晉唐皆貫澈

典墳今昔不荒蕪君家庭戶聞風旨吾事分毫等博屠
豈待曲終思雅頌直緣背癢遇麻姑預求補益三年艾
深識妖邪九尾狐博物偉然窺子產濟時豈必愧夷吾

醑醑一首

絆挽風光數丈枝曳松拖雪不勝宜濃鉛輕素誰調練
鬱蔥滋蘭無等夷婆律著人醒自解昆吾雕玉賞尤奇
攀條艷蕊思京洛末利晶熒自一時

次韻鄧志宏三月辛卯大雨雹

剝圭碎壁崑山頽天容黯慘凝不開隋和抵鵲虎兕吼
陽愆陰伏推從來雀鼠懷安怖入壁聲侷海翻星隕石
疾雷破山萬壑沸急雨懸河平地尺嘉生春淺纔纖毫
季子禦電勤嗟嗥冲冲鑿冰窮谷裏申豐此說殊未高

又梅齋巖韻

振條裂石寒颼颼霰集黃昏天為愁若蘭政恐遠庭戶
健步斲本移巖幽斷魂能返神可雪照夜薰天欲奔月
妖韶敷艷滿東風膚清骨秀無相絕

跋思古齋詩卷

娉然林下趣仙袂擁書籤心迹清無滓情聲慧且謙
璪牕龜背戲彤管兔毫尖十願獨非僭陶云那得添

僧庵崖上榴花

蒼崖有紅榴照眼風櫺迴鶴頂磨丹明猩脣染羅竟
天然同心帶物理有殊稟青鳥感絳巾奇膠綴琴軫子雲
畔牢愁無偕溱洧贈思致玉瓏鬆皎兮麗宮井江嶠瑣
蠻煙空煩洛生詠山僧遞形語呵乃枯禪病喁諷獨移

時鷗没天宇淨

游鼓山一首

孫子安
見招

呼船起柂乘潮平掠牕飄箔疎雨傾漱石枕流東道主
擲風沐雨吾曹行百尋懸瀑瀉紳珮兩邊喬木翔枅甍
乞漿滿甌牛乳粥縱酒下筋馳躡美躋摩頂踵歷蹬術
牽挽葛藟披荆榛荒浪攙差復奄靄截辟巖巖仍稜層
嗥煙歛雨猿鶴宅絕山航海樵漁能草衣穴處避世士
木食澗飲安禪僧芝房雲閣無盡藏月屏風幌長明燈

笑看闌闌一蟻垤揮斥氛侵投蠻藤經行石窰解滕屨
飲灌匏杓談淄澠莫嗔踏碎蒼苔色莫嫌汲濁陰井清
膏肓泉石有鑿裁騰蹕巖崿試股肱要識石鼓真面目
立置枕几非繪繒風吹楊葉此山下欲問故老知誰磨
市朝一夢爭奪際山海蕭散堪伏膺

和洪王甫祕監荔枝三首

林杪摘星隕江干疑燒然香包浣花錦冰質藐姑仙巨
擘紛璀璨丁香吐妙妍唐亡傾國笑何物免罹愆

閩中譜殊盛唐相賦初工萬點凝霞赤三危滴露叢驅
蘆抵烏鵲投李飫兒童子美吟西蜀櫻桃先後紅

瘴鄉駢瑣質善地最蒲闔冠絕林間品難為坐上賓蟠
桃壽天帝萍實薦居宸無逸為龜策何煩萬馬塵

雙溪集卷一

欽定四庫全書

雙溪集卷二

宋 蘇籀 撰

古律

次韻待制王公出示李公丞相鼓山唱和之什
不揆蕪累奉和一首

顛昂經世量超軼塵秕淨猗歟尋山屐汎矣隨波艇顏
筆振巖崖戎眼清水鏡平籟青雲步何如蒼蘚蹬忘懷
挈伯雅寓意彈韻磬物外赤松期域中兜率負江溟噓

吸際霞侵廓，虧映龍象千。礎攢簷，屨十方并。彌天各縱
辯，酌海終弗罄。公侯誠得一品物，將大定。瞿曇舊標，絕
嵌洞尤奇勝。雷唱澗流迴，石刻惟人競。半山琅玕響，一
井玻璃瑩。松風瀑水合時鳥，慙人聽。慷慨羊鄒游，雍容
裴白並。溪谷有佳色，題品益光幸。渭濱行將獵，詔促預
叅乘。王公居客石，羊舌偕趙孟。小人繆好事，大冊挾晨
暝。擊節穆清風，續騷聊比興。

次韻洪令穀瑞平遠臺

能賦憑高所得多海雲巖嶸若君何兼通西竺瞿曇意
欲和南風虞舜歌怪石甘泉作檀施長廊古殿蔭多羅
相期正始微言緒詩眼休嫌俗吏過

洪子再示論詩之意荅一首

文章三昧亦無多甄品難甘狀杜何撚脫髭鬚徒自哂
可憐彈缺為誰歌腐陳點化為珍玩翡翠鷓鴣入罽羅
擬續蘭臺快哉賦後來作者豈容過

王叔明示長句訝烏澗人不出楚則失矣齊亦

未為得也次韻一笑

忍對三峯閔兩山澹我三五韻幽閒王郎賓席自水冷
君須舉缺人捨環烏澗門階未嘗峻瑞峯重深一百間
列屋羅帷隔風日九迴沈水紆髻鬟使君素負凌霄志
矍儒何以換醜顏龍香小袖酬綠醕不管紫雲私有語
美哉江色釀山光青瑣勤開看煙雨

次韻王文豐父待制荔枝二十韻

葉實根株尚老蒼龍鱗臯比貴先嘗干林斷送詩騷酒

三絕無逾色味薌爛醞恢台養風骨涵滋沆瀣結天漿
怕寒僻處深於越贄貢無階遇有唐葱鬱梧楸共庭戶
風流芝玉秀齋房剖絨絳錦紛狼藉瑩手摩尼可比方
頰卵鱗皴雄俎豆雙珠同蒂媚釵梁摘憂林薄明朝竭
繆論蕉盧幾許黃口腹定非孤寓客甘腴盡道勝吾鄉
峽山高咏詩昌白韶石英風賦予張芍藥亦能煩驛置
蒲萄豈必擅西涼彈園金橘差堅久瑛赤含桃詎可雙
逆目提籠過闌闌解頤夢渴吸湖江仲宣鴻筆絲綸手

摩詰清才黼藻光妙絕揀枝墻欲動纖纖稱去聲擘侍于

傍翰林紀績延真賞縣長繩愆且彌忘

先伯祖云莫遣騷人說功過

賜燕行看與懷核分題今日記升堂傷時有似少陵杜
上疏豈惟臨武羌深忌河豚怒瑤柱沈思橄欖過糖霜
詞情鑒裁俱超卓促召龍墀獻早囊

木樨花一首

何處聞國薌珍木秀巖谷高標蕙蘭枝妙輯沈麝酷葉
葉秋聲中霏霏蚤英藪介特有如松繁華豈慙菊勃蔚

襲軒墀薰沾滿衣服
情人擢纖指拾藥動
盈掬蘂蕪見
離騷苓藿入譜錄
卉裳未可更鮑肆
或爭逐亂插琉璃
瓶於斯殊不俗

寒夜

鐵檠知漏永熠燿照虬螭
三策遺當世一封陳厥謨
甫田須疾耒巨浸想乘桴
應猝誠乖用何名道不誣

觀兵

錯捐金帶子輿臺
李典張遼安在哉
濟溺我應知大畧

摧鋒人自得高才伍符勤選加搜練戎閫徐圖妙鑿裁

引領山西十萬騎中原失御實堪哀

余游陝西聞五路
騎士尚過此數

次韻洪穀瑞摸臨臯亭四畫

水 狼石
灌莽 竹

退筆殘煤作冢池庶幾極力更前追尋源巴峽濤瀧派
得骨柯山鐵樹枝京口風雲隨叱咤涓川霆電掃端歌
刻舟事往何嗟及拙目高心付點癡

次韻洪令三月晦見寄

摻袂東君屬此觴朱明履運返何鄉結成碩果鸛鷓語

吹盡落花桑柘光
梅雨聞君醉山閣
麥風招我步濠梁
惜春歲月那相貸
腸斷連山草樹長

東山一首

骭麟田官委吏偕
山於吾屬倍青哉
星言輿轎蒙龍裏
山半振衣巖闕埃
箴水布畦春澤匝
吟風夾路歲寒來
架巖列木泉悲響
鑠洞白雲花爛開
灰冷虛堂敷白氎
爨清一飯脯青苔
欲求出世三空義
一吐疎狂道眼裁

程帥新作止戈堂索詩謹賦三首

邊庭氓隸敢滔天
亂領妖胥伏乃愆
獻馘牙門森戟纛
解嚴後廡戢戈鋌
勞歸宣潤竒材客
勅賜番禹饋米船
勸課蠶桑陳俎豆
頑愚悛悟悔從前

都士萬家吁盜守
日行三百檄書馳
蠻刀短楯相繩撻
章甫毛錐亦可支
三道來攻吾設倣
千艘利涉爾焉知
三州十萬歸農畝
橐戢無窮歌頌詩

楚王禁暴慙京觀
漢世殘民闕徼邊
伐叛從來非得已
修文自古屬高賢
禽魚草木無垠惠
鄉校康莊議論妍

盡悴使君朝聽美不然海國豈安全

連雨偶成二首

檻櫺生菌地生衣
釜甑有魚盤
有薇適俗簪裾取
縈挽累人口腹得
嶮崎行看海霧江
雲盡却放風臺月
觀輝撥置圖書絕
欣慨一巾一鉢款
山扉

愚翁夸甫骨應寒
宇宙因誰危與安
治道灼知斯鞅妄
中興竊擬導安難
文章一伎真何益
得失他年極易觀
私喜崔駟薄班固
繆賢朱博毀師丹

雕木工

戲示
鄭子

君不見嶧山高崖斯相蹟棗木刻摸真並失又不見深
之袖手安國碑帝悟百牛掀倒石秦唐二子皆有聲何
必今人不逾昔拙工礪器雕不已印版傳書差可貴方
趺圓首効碑影穿鑿膠黏總紕纒鳳山之水生瓊玖斲
磨光澤堅而黜文章光艷照千古玉牒萬金吁可剖刊
剗四海多名手何必區區鑄腐朽

送朱喬年被舉薦監石井鎮

石井鎮初騰一鶚管城子健幹千鈞已然自足雄吾黨
其進祇應軼古人衣被卉裳殊俗慣解捐犢佩猾商馴
萬鍾他日扶危手五斗怡怡為奉親

奉和秘監洪丈迎諫議徐公建除之什并次元

韻

建極翊皇輿蓬廬懷致主除書肆時夏提綱衆目舉滿
朝想風采愛及巾墊雨平平戒自守落落進攻取定傾
繫其人防秋今尚暑執輿岫嶠嶺擲風闔海浦破的出

新詩江山繚樽俎危機見未萌剛鯁殊不吐成憲萬方
瞻作者七人數收召無遺賢商山非為呂開悟堯舜心
允宗誠刻苦閉門踰厥垣孰與驅馳許

古勸學行

昔歲原伯魯前日棘子成所謂悉常事野哉亦苟生豈
知負孔聖義理如何行善飯斯為福食肉其堪盲六籍
漫不省千載誰辨明秦時害文維法吏趙高超趙誑當
世小夫無知信可恥大官不學羸且鄙深思博問如其

智精義入神以致治從來廊廟須奇策乃用弓戈為快
意孔明澤中梁甫吟著表行師肯倩人呂蒙孜孜窺往
事知新益解圖當今橫槊胡為忘試藝不文不武伊何
遵嗟予貧賤年將老學古憂時滿懷抱斯民陷溺豈無
說天下復平要有道子思立教自明誠伯業華巔愈貧
討

夏旱一首

陽厄會百六驕亢慘如燬素秋垂二十七旬赤千里土

田靈龜坼水車渴烏柅歷時書不雨槁矣吁田穉雖然
海有潮何堪井無水塞鼻炎煙鬱吹面江風靡憬俗雪
不降炎洲冰詎履虐魃豈勝誅巫尪窘懼悴雩禱按典
爨祝史殊跛倚資舟舟已盡振廩廩餘幾枵然望雲漢
邈乎嗥屏翳戎虜未入朝耕戰誠勞勩收募聯什伍倍
蓰給餉饋伊人虧顆粒主者遭忿詈覆載疑亭育遽蔭
視生類作為三日霖霧淹萬事理焦枯已不救根蘖或
可冀疲民億萬口生生倚天帝侏儒一囊足孤寡千箱

賜三軍盡覓藻邦邑豈小又

張子安求無外道人挽詞

奉匱誰過仲卿賢獨泣牛衣枕淚眠
墨誤唾花衫未故詩題摘葉梯猶鮮
淒涼玉雪卿卿意惆悵房櫳步步蓮
撫念琴書舊同賞爵名重刻更巍然

芙蓉城闕宜通籍姑射山頭素卜鄰
舉世難工斷腸句何時再得捧心人
芝蘭奕代傳遺懿玉樹千年鎖暗塵
珍重清風入襟袖每篇佳處想精神

閩中秩滿一首

蠻府同僚問字奇老成衣鉢舊箴規颶風不訝飛黃雀
汗漬猶將貸病鷗前日幕謀非妙伎今時民瘼愧良醫
徑從南浦攜書笈吉貝裳衣皂帽帷

次韻洪穀瑞見和

此間空洞最無奇整整從繩僅滿規併譜沈薌及苓藿
公言羊質錄鴉鷗禿巾鮑肆穿芒屨爭席畦丁與馬醫
海浸冰銷元凱癖玉盃繁露董生帷

招范子儀登昇山次范韻

束帶殊憎市聲沸幅中聊復隱居尋凌虛馬鞍林巒表
滴翠馳表澗谷深箇裏膏肓空自許何期煙雨撓重臨
長餅大白開狂喙絕海驅山歎未禁

送范比部持節廣東

羊城使者神仙中冉冉叱馭凌雲蹤繡袂吾徒強摻執
解手一舉南飛鴻君侯烜赫標肉譜文正烈祖忠宣父
典刑付託呼所鍾經國風規儼如故傷時嗟我思古人

遺直茂勲君世嗣春秋主盟由范氏不戰屈人從范智
備嘗世故無難易出入淹迴俱掌計世推汲偃似長孺
共懷下惠賢展喜烏言夷面吾氓耳豈弟公清渠自理
聲華本實警蠻貊鋒穎天然加峭利轉糧遵海爰究度
併按三河應不避追車少日便還朝首出儒林冠循吏

與可墨竹二十韻

天工竒水墨晴景照檀欒影動嵇阮愛筍穿淇渭干禪
翁三昧力老手一揮間意匠先鶻落心造忘筆端芥曾

極翁蔚振袖疾飛翰道妙進乎伎自得即之安剛耿在
眉睫歲寒出脾肝動色誤傾耳可聽非惟觀颯還掀翠
羽交戛敲琅玕雷驚碧霄聳風倒懸崖攀雨霜斜重勢
龍鳳飛鳴竿勁挺加掩冉英竒閱雕殘緹繒釘牆仞秀
絕襲衣冠備悉湖州派恨不彭城看不可無此君寧可
弗至膳買林自虧蔽折檻縈叢攢房櫳侍使壁園苑隔
扃關要見一室中幸容四壁寬此畫會通靈請公牢鑄
絨王侯儻奉借定鑠空厨還

次韻范子儀怡山飯訖訪王仙君舊迹一首

雲衲撞鐘集鶴衣
輿轎來暫沾彭澤酒
豈礙太常齋道
釋縱橫說門庭
南北開阜叢天籟
響基罷想龜迴

次韻范子儀東山之什

東隅嶺嶠紆層出
濃翠春粧日夕佳
僧老林丘黨猿鹿
地靈山澤產龍蛇
井泉移得天台脈
洞壑時開閬苑花
可笑籃輿趁斜日
白雲迴首梵王家

次韻伯業賦詩相迎喜予解秩一首

長衾大枕寢將安
獅子成擒路不難
充類未應於義盡
去官無責本恭寬
兵戈銷弭非吾力
冠劍踈慵強汝彈
新歲舉觴嘉善禱
掃清崧穎並憑鞍

次韻洪六丈舍人蘇黃馬券一首

長鳴天廐起毛龍
萬馬皆喑一洗中
立仗式儀稽馬叟
解驂牽賜有裴公
累年兵火蘇黃蹟
舊券山河帶礪同
攬筆詩翁擬騷雅
雄然臺閣快哉風

汲東坡所浚井一首

帥貳英英駐節旄繼唐流澤便滔滔源深東絕三橋市
漲縮西湖二寸篙溝駛甃堅無旱潦瓶翻筒漏飲豚羔
私家誦佛千畦稻官帑收功萬斛醪

旅舍中秋一首

蘆笙茆茹野人編竹机藜床已侈然月滿光臨感珠夜
風高冷過曝衣天酒浮鹽肆人呼友雀啁梅花驚睨蓮
靜士兀然方止酒舊琴不計有無絃

小僧乞其師靜悟塔銘一首

劫火吳宮盡者年亦已殂
勲拳依佛勅精苦是僧摸
願力歸兜率宗風化給孤
禪心不淪謝楚些漫招呼

將軍一首

將軍義勇名蜂蟻嘗旅拒俯
邇建赤油超搖揮白羽不
辭援鼓桴豈以遺君父匈奴
恨未滅致官逾噲伍麾下
例千金赫然士豫附家庭樹
曲旃天街騰露布平昌平
恩侯議論寧肯忤萬金十千
戶募將斬亡虜列屋鑠名
倡連車載清酤用錢取水衡
卜宅凌武庫山岳勢能移

震電赫憑怒畫地成江河鼻息吹雲霧私鬪患不怯公
戰則先務可憐金玉帛殊勝煙埃土嗟彼紳佩儔索漠
何太寔試移名將傳予汝頻晤語

夜涼

白屋秋聲裏蹉跎旅食春挑燈魯酒薄拊枕越雞晨學
術家傳業風流德有鄰似聞川陝捷吾道付峨岷

題張公文潛詩卷一首

羣才奔正始辯論軼髯卿諸老力推轂斯文有定評龍

旗叔孫氏金筆左丘明杖杜嘗嗤點椒蘭足陷傾窮途
非黨侶陋屋掛冠纓彰炳流千載嗟咨莫兩楹桑粉墮
兵火簡札落寰瀛態度雲霞蔚瑰竒珠玉生淵停真可
挹川駛不留行機杼班揚舊笙竽陶謝并風騷齊穆若
郊島埒低平百末芳蜂採千岐理刃迎斧斤皆閣東鑿
柄自天成大論尤宏博短章工冽清精微演孔佛剛毅
獎周京糲食何曾饜高標不朽名斐然愚小子欽詠有
餘聲

國士一首

五陵少年銅乳臭，哲肅何甘作牛後。曲合汙世鄉原徒，
俗學聾瞽紛蕪莠。文士規模正始間，風流可喜未曾有。
志士機敏常濟務，斡旋金穀捷趨走。取亂尤須見兵勢，
料敵先應決攻守。至言碩畫安危機，却顧前思能審究。
服戎角力乃兵耳，入幄造膝直禦寇。人心天意歸有道，
務穡訓學臻富壽。自古迂儒無益算，蓋世竒才實天授。
誰能剡牘出公言，明年定取單于首。

聞舊曲一首

短舞長謳撩性情
狗翻研鼓醉承平
六么花下西湖集
三疊雲凝玉塞聲
治世之音豈淪謝
淫哇已極返和清
關雎正雅終知律
前聖嘗云畏後生

中觴二絕

欲瀾秋水剪瞳人
愁絕春山傲玉真
擘了荔支拋豈噉
送鈎非復近前嗔

珠貫筍彎奇出倫
龍蘭入縷疊文茵
芳年長好長歡夜

金瓶梅詞話卷二
滿意同心同夢人

題兩黃仙人鍊丹山頂一絕

絲毫觸石千山澤
喙吻傳聲萬壑雷
信有藓書標洞府
不應俗駕半途迴

平津一首

布衣海上看羣豕
金門晚躋作三吏
漢主功名氣薄雲
柄用儒術親且貴
曉通當世博前聞
自得春秋有餘地
臣節儉約君道廣
烜赫顛昂仍布被
蒼海西南罷遠征

懇弃朔方違詔旨發策不如朱長史庭論依違何委靡
議誅郭解沮卜式山東鄙人殊不鄙流輩紛紛稱職難
黃髮鬢鬢保終始

皇甫一首

吏部初學除陳言學成理達無可刪腐朽點化皆不凡
有如黃河出崑崙魚龍萬怪隨濤奔志氣剛偉充乾坤
灌溉所短誇雄渾篇什性情禮義根亦曰餘事期知文
弟子皇甫同光塵師說豈不明淵源首推燕許潤王綸

明堂郊廟嚴且尊，嗚呼古人弗妄云。研鑽百家窮典墳，
兩賢纂組承華勛。演敷竒致開妙門，盪耀四海蘇頑昏。

中壘一首

更生傾側四斥已，精誠所祈格天地。著明深切安危機，
同道蕭周數人耳。不容何病見君子，節義政應強國勢。
倖卿權尹豈嘗無忠正，得朋僥冒柅可憐。孤直援又寡，
惡惡如風力排詆。漢皇聽納知其忠，左右側目爭摧圯。
親親公族人莫比，按據春秋憂變異。蕭張戮死正人空。

挫姦救危寧畏忌勤勤請抑外家權社稷安榮長久計
二十餘年列大夫痛切皇輿難坐視當時不謂秦無人
異世知音誠歎企亂生禍重英傑資無競維人當樹置
絳侯博陸在巖廊高武不復憂劉氏胡為一簣障江河
諫鼓屢鳴那得濟

甲寅歲雪一首

冬燠陽淫遇上春飛翼爽徹浩無垠凌霄據壤平窪凸
破塊抽萌蝕腐陳皎潔肌容宜夜覲培堆霰鬆詰朝新

勻勻帝澤烝民粒止止人寰世界塵野渡舟沈堆鷺羽
豪家堂下散瑤珉袁生高卧誠清尚慧可安心柰苦辛

程待制邁父求挽詞

從班有子蒔咳蘭三貴相承德齒官政理庭闈貽濟美
暄涼枕席問平安箕裘桑梓人欽羨滄瀆膏飴養色難
千乘送車傾井邑劍留傳寶涕汎瀾

太古衣冠綺季風履眉鶴骨似霜松一枰瓜葛為嬉笑
奕葉芝蘭真睦雍珍具乞言端有屬摺紳歌咏慶惟鍾

歸全五福殊無憾密印行將一品封

題僧寮白瑞薌一首

芳蕤何蒨絢尤物真旖旎五葉映雕欄三椹駢粉蘂妍
分春月魄香徹肌骨髓壁觀艷成魔鶴林神作祟豈特
梅可簪殊勝麝多忌野藿與戎葵猶堪解其穢

韓簿之常山送行一首

蒼隼卑飛亦將擊素琴不擬貴高張勾稽俛首親朱墨
甘旨役心謀稻粱吏幹能稱追伯仲朝端近例真周行

題名塔廟經坊市俯矚煙雲越澗岡相勉三餘牽著擬
助栽九畹待芬芳繫維騏驥初從輒強勁兼葭要飽霜
縣小官閒無甚責秩卑俸薄又何傷公田私畝工夫徧
世閱前修在激昂

紬史

延陵皋壤決歸歟習氣過憂觚不觚何怪倚門嗟抗髒
近來合樂寵侏儒過關自欲聞雞唱居肆何須較馬摸
乖合偶然非汝力迷途先覺解攣拘

著書

著書前古老虞卿何必窮愁學乃成
駕說精心是家訓
修辭肆筆體人情少年竦躍文章慕
老去冲融道術鳴
流畧從今皆指掌粗令衰世不喑盲

大塢山寺

巖谷窈幽深映發杉松嘉擊鉢半喬木
燒香亂煙霞穹
林擢峭壁攬竦迴環遮四合山復山
泉籟音響譁清致
滿樓閣道人心靡他寒碣梯栗秋
暗牕秀杵把勸飛暫

投迹脫兔無復置如粲鹽酪空解釧與笄
劫餘生愧語
偷逆旅即住家戰鼓震淮甸雄師奮爪牙
儒士繆揣摩
戎韜政紛拏才智為人謀何事丘中麻冥鴻
跨海岱逝
水悲榮華曠哉游方外心迹同幽遐

雙溪集卷二

欽定四庫全書

雙溪集卷三

宋 蘇籀 撰

古律

幽栖三首

去去追濠濮悠悠平渭莘
荒涼羅雀處寤寐叱牛頻
鴉炙逢希闊萍蘂適醞醇
自謀螻蟻穴何以拯斯人

豹霧谷容晦虎風林響寒
通宵喧澗瀨出日照嵐巒
揜卷妨作樂堵節詠考槃
王孫有窟宅吾道尚艱難

三芝羽人佇五誠
壞衣脩農圃日用事
芻蕘無幾求林丘
識真趣城闕罷菟
裘揮斥塵勞客平
生為道謀

臘雪一首

吞屋糝空噪越犬如
椽懸乳戰吳僧晶
然一色紛無際飄
瞥羣花散却凝人
迹禽飛遭屏絕竹
端松頂重何勝將
軍逐虜弓刀濕坐
幄書生能不能

晴日縱步二首

窮臘未垂風景和
久游誠是我陵阿
牧童笛遠雞鳧散

獵戶弓鳴獬鹿多
季雅澗澗疑蜜釀
木奴小小似金槎
起溲十裂吳羹醜
止酒陶詩但獨哦

久病不飲
及罷湯餅

雲際潺湲入下田
田塍級級逗平泉
羊腸瑩瑩塞裳過
蝸殼踈藏插槿邊
荷篠何人行嘆息
饋漿與客更留連
丹霞翠霧皆招隱
一抹殘陽衆木顛

和卷中韓子蒼梅花三首

先開媚晴昊
孤艷斷魂時
遶樹沈煙度
凌寒檀暈披
參橫明月觀
雪細影娥池
結實冥冥雨
君看雀啅枝

凍枿雖臞甚含英山意催斲冰衝曉色綻綠透春迴健
步故人信流芳好事盃不論山水僻往往拾香來

國香傾國色天質殆天憐含笑冰崖側無言石瀨濺湘

娥愁暮倚孫令馥終筵卜夜多松炬玉容殊更妍

杜子美

簷索共
梅花笑

留別趙大年并姪十七秀才

晉公賓佐選英毅冠朝端三日拂冠劍一時增羽翰世
家存器質國論佇圖難從此拋經卷青氍拜近官

君年有餘富我老漸來侵莽蒼磨颯野峙停鸞鶴音藜
羹秉觚牘筭路向山林商畧古人意孜孜不患深

瑞香一首呈韓子平

未拆嬌紅淺紫駢差差衆葉翠翹然誤稱蘭艷風流冠
且縱桃夭萬一憐列檻閉帷增峭烈訴盃閣筆負嬋娟
司花處子春風面醲態竒香想象焉

金華邵氏面山臨溪而居又架木為亭雲林丘
壑之勝趣乃兼得之邵氏求其名予誦東坡江

郊詩名之曰舊約題一絕

茂林翠巘碧潺湲涼月白雲飄素筵
几杖逍遙領其會
佳哉舊約有餘妍

大暑憶靈隱寺冷泉一首

我念熱客辭懷哉冷泉游此水暨此山
清便物殊尤澄
渟快一生晶澈奪兩眸青瑤碧玻瓈
三頃方能伴澡雪
戲嶽間大川漫悠悠沅淪鑑臨際千仞險
何求面堂浸
几筵汎槩颺扁舟泠泠柝醒惛一一數
鰕鱖當階掬珠

壁欹枕拖綸雷霆落閨喧雪霜浮磧流京江謝潔滑
苔雪雄徧州月夕了無滓暑天常似秋拜塵付一吟汨
泥亦包羞願浴岐山鳳勿飲荊州牛

苦熱二首

示病劉松殊不飲爍燔汗眩兀如癡塵囂掘堞東山扇
汨濁祇慙叔度陂茗汁粟漿迴渴夢大門高屋憚炎曦
生靈惴惴苗同槁救暘哀祈風雨吹

越吟吳詠兩參商我那臯原儂水鄉赤地千倉待舂簸

炎飈九夏劇晴陽雲霓不族訟風伯雷電慙勞驅畢方
獨卧嗟咨龍伯嬾夢乘天駟灑淋浪

題徐師川詩卷一首

學究村村自謂賢西京涇渭派淪連古人聖處工研貫
新義阿時力洗滌炳闇多聞包宇宙闡寥餘韻出蹠筌
飄然徑造騷人室老憤應加視後鞭

不雨一絕

雲將礮車來禦敵雨師箭鏃挿于房西成一顆望千滴

跋扈朱明未可量

校讐古史二首

炎犧分紀到先秦散脫前聞待發明處士妄談紛戰國
專門阿黨蔽西京塵沙滌蕩川歸海故實符同史與經
夢奠老人遺意得摩天巨刃不留行

貌從周孔譏誣偽臆斷詩書悉牴牾悟悟鑿精明原本末
討窮商略較錙銖所存偶免隨秦火不喻遺忘笑漢儒
理勝凜然詞旨達知音儻遇聖人徒

次韻范才元中秋夜

嫦娥偕婺女萬里玉京會雲璈闕未終莫靄黯愁對真
人一馨欬開闔隨霽晦寒波揚廣廷清光一年最頃刻
人間世銀色化諸穢法士屏盃杓癡兒戀珍貝皆言此
宵樂復欲何時醉蟾宮正植璧星潢亦委佩

晚秋偶成

生涯一笑槁梧橫葉下寒波收潦清金鈿露香花近信
乳泓雲撥酒新萌岷人罷賦家四壁洛客嬾吟碁一枰

流落竈竦分樵牧故人袞袞任公卿

僑居

買僮貸宅愈迂踈穎士皆能講舊廬典學前聞質郢子
天人定勝取申胥未應孤負囊中筆粗爾消磨架上書
借問琴絲誰任理豈惟短髮每晨梳

次韻伯父茶花

鳥侏傾藍雨春霽瓊芳入眼霧冬昏一枝膚雪壺中曜
靜儿低窗養晏溫

真態妖香自不言
斲冰修月妙無痕
直須齧松風
豈患詩魔渴醉魂

北榭

坐消床刃肘生胝
寓目危亭汗漫期
奄靄煙嵐客愁絕
高明茨葦屋云誰
治城屢肆吁吾有近
市塵囂嬾汝移
金刹仙梯霞侵近
雲駟風馬往來馳
鶴鳴華表青田志
鴈引邊沙朔氣飛
越北燕南紛會解
僖音憬俗寢相知
數丘水竹揮毫助
友愛朋從攝袂隨
老鈍貪追仲宣賦

達生不沈子長竒

陳翁妻何氏挽詞

馴和乃宗競攻苦更家豐不失蒸嘗職無非女士風南
陔泣笄冠中饋歎光鴻夜績燈誰續承承錫祚隆

潘舍人求父朝議挽詩

紫微內史世常揚鶴髮尊榮侍膝旁桂籍連枝皆挺特
蘭陔六藝競芬芳雲霄門閥公侯拜藻斧淵源典冊光
水擊三千由積厚天資九十恃康強青衿縞素行師服

輓鐸謳吟廣柳箱
大啟新阡高冢舍
義方不羨竇家郎
寄呂德元時為督府屬二絕

稍費江南萬側釐
多謄符檄喻亡齊
寬然折筭可入汴
已見票姚擒日磧

祖生晚節並劉琨
獨免聲消賈謚塵
虎士淮淝初小捷
謝庭蘭玉絕常倫

靈巖寺偃松一首

直哉十尋幹亭亭
無附枝紆哉獨縱
肆蟠據何離竒垂

髯鬱千霜蛟臂犀兕皮搽剛為謙屈至高而聽卑攀玩
凡幾曲凜冽英雄姿傑卓矧尚同擺落造物為進乎繩
纒外詭異有所施激耳奏竽瑟超世騰龍螭橫秋老氣
逸軼材那紲羈高可容冠輿清甚生冷颺先容噐萬乘
愛身恐無辭抑抑衛武公逮下文王妃筇竹與酒壺掛
空憩寂時客來秋冬際狗駟車雞栖有僧捫翠拂擎跏
求此詩

送韓少汲萍鄉尉

大門人望舊旌旄，嶺表瀧頭罄錯刀。
中饋從誰合紅氍，郵亭自詭絮征袍。
青衫九品非君愠，黃卷連車慰我曹。
蘭蕙滿山山水縣，遙知放意詠離騷。

讀范龍閣五文奏議三絕

撫編屢歎才謨遠，蚤歲升堂拜若人。
疊疊聽言皆破的，龍蛇蟠屈負經綸。

奕枰著著窮機變，庖刃恢恢中會通。
世俗吏能那並比，汗顏血指竟何功。

九原英魄誰能作規略千條殆可尋
佐佑艱難揣夷狄似茲舉措好為霖

題南圃一首

妖嬈十五餘清春破瓜初婉膩詎如玉
凌風素雲裾鶯燕妬聲實窈窕自有夫
取憐逆萬目白地腸應無惶惑少年士
逐麋不顧菟傾囊買消渴借問誰家姝

送都屬八舍弟桂林買馬一首

夷德貪婪漢財賄莫惜金多能使鬼噴玉
難拘伏波式

上駟超搖獻天子子今叱馭湘南喬桂嶺下下復高高
鳥驚獸駭征人喟當官官事從容理思馬斯臧由此始
電尾風駿未平齒絕壑蹕山如歷塊執驅效牽髯校尉
槽櫪經由書殿最謝公總統修戎備二柄德刑兼兩寄
不矜吾黨愈推能宵旰潛心活國計雜沓英豪乘虎騎
日關神州一百里

望道一首

少年相尚依阿語老大迴看不住心望道尊師豈盲進

憂時論事敢浮沈，侏儒飽死嗤方朔。
懸磬饑貧類展禽，好古宜交魯衛士。
幽風咀噍有遺音。

疎嬾一首

妨人作樂屏書籤，閣筆無情復強捻。
執御祇應曩規範，鍛金不假別錘鈇。
花開吐吐人清苦，鳥哢聲聲夢黑憇。
出世世間皆有道，糟醅餽量難兼。

臨雙溪一首

汪汪西步桃花候，去去南巒蒼狗雲。
日煖汀沙牧人夢。

春嬉鳧鷺野夫芹繚鄂左右交流澮彼岸烟昏漲梓枌
頷首悠然辨真趣會心比況有奇聞

憶京雜木芍藥三絕

孰美酣馨迸佳瑞暈稜紅碧化神工根株肇自韓郎染
葩鶻人間一洗空

沈蕙亭北壓欄杆眩耀熒煌障幄寬不薄官梅伴飛霰
只饒蘭蕙楚騷寒

廬陵凍水攜參佐媚紫嬌黃左與姚何物山丹銜流俗

維生懊惱愠蓬飄

睡起一首

身將抱甕灌田疇老大徒傷鬢已秋
滯念生緣寧故我濟時及物勉前修
勃磳行世終剛介重惜尤人返自求
塞馬未嘗矜得儁湘猿不在較羣猴

送才元長樂倅

東省西臺除吏目軼才勿謂得途賒
孰云相貳徒勞職政恐東南弗復加
常袞頒宣禮翹秀仲翔好事走幽遐

口占十吏傳州檄指畫千條靖海涯榕木覆街飛早蓋
荔園供餉赫凝霞政平頌簡清如水能賦登高墨似鴉
咻彼夷音姑洛詠歸來越橐換吳娃摳衣岑范欽高致
談舌瀾翻潑貢茶

秋夜聽雨一首

蕭騷閨響空階滴復值幽人對榻時旨趣逍遙稱漫叟
鋒鏃扞格愧神錐願擯謝萬令閒處實藉陳平屢出奇
心境卧輪非別伎少年狡獪赴無為

廛居一首

廣輪函丈中唐甃安得青松栢篠柵蘭菊葵荷聊代置
烏烏鶯鴨粗相諳中田他日規蝸舍諸嶽白雲縈翠嵐
耕殖自營天韻佚世芬妨道豈宜耽

簡江國韓尉謝珍惠二絕

江國絲蠻登俎味弱缸漬畔糝鹽醯坐愚糜殞追時好
嗟汝頭臚不自知

獠羞巒錯儒庖溲熊掌大啗牛尾狸飫鬻羊膀與駝蹠

芳辛咀噍半酣宜

李監廟求拙軒一首

曼巧累瓴甃几席面春叢林塢純真趣衣巾質古風寧
非迂叟合豈與漫郎同不巧姑云爾何妨詩更工

送趙憲御史赴江西三絕

崆峒日煖嵐巒麗章貢桃花春漲豪避傳封人候驄馬
道旁武吏各韃橐

賈生纂著五十八元歎風規自伯嗾貪吏草心寬賤坐

頑叟耒耜不推埋

冷坐從嘲餅井眉俗流淺拙更忘遺道鳴庶矣多聞力
建武官僚舊漢儀

寒食後出郊一首

澹沲東風酒一卮笙篁雞鞠傲春暉綠波泛澗心微蕩
邃苑提攜手未揮霍靡莎長縈冶步猗儺花亞冑薰衣
桃溪飛彈游童過竹塢聞碁道士歸

龍翔真歇和尚求詩贈一首

象骨巖居閩府教江海兩封黃紙召孤雲自南仍更東
阻覲堯堯友廊廟講通明論毗曇經一佛出世祇為人
凝師白傳有真契鑿齒彌天必相值河漢滔滔渺涯涘
三反九折時遊戲簷屨躋堂累千輩鉤雷激電非思議
毫忽微差失大千同盡鴛鴻與螻蟻菩提一切皆具足
刮膜分光誠豈弟體味龍宮七佛書盧老面目云何是
餘生流浪無明窟迴首塵塵非自己季咸鬼眼必見窺
和璞妙算應不遺大士知言善呵蔽朝聞夕殞甘如飴

疑虵一祛病當愈識路還家要有時金華士女涕泗流
胡為決往龍翔游是間雖住亦非住奔軼常行祖師處

送富樞知三衢三首

琳館屢青書帶草璽封薦捧紫芝泥寅車暫此紆台紱
黃閣依前執命珪表按山川袴襦內勸農雲水插秧齊
論毗國是惟公避令順民心不曰卑

代夫襟量服英髦能扈王舟出海潮輕重裴公陳梗切
安危汲孺絕麾招吟牋訪古羊騰石奕局行春柯爛樵

謝傅不應丘壑尚絕塵機警冠當朝

山林引避一無求
逋返巖廊豈自由
聖主尊賢載謨誥
故家紀善付春秋
公誠願獎朝中意
密勿謀先天下憂
臭味久令參籍湜
斐然攀賦畔牢愁

示兒子詡

屬詞更聽三年後
為善須無一念乖
孔里高高若崧岱
論思積習見巖崖

送中書潘舍人省上二首

紫微雞省待論思少作英辭寤東竒高浪駕天輸朗漢
紫霄即日奮長離然明東里今同道德裕封教適此時
應笑迂慵畸已甚嗚呼鶴巘綴蟬枝

亟紆多難一羣心惕厲咨嗟慙惻深漢制春溫勸敦本
周家夙戒豈無箴該淹伯始萬端理煩悉姬公五誥尋
愈近清光綴經席皇風如玉亦如金

訪鹿田二首

隱士雲凝北山麓將軍樹竦碧崖寒烏捷戶富犁千畝

蒼筤梯空擢萬竿
犖犖馬鞭貪快睹
森森僧席飫竒觀
未應泉石減天竺
自古英靈招考槃

夕陽紅曬稊生粉
曉露凝清粟脫蓬
樂歲人并厯彘飽
高城地隔馬牛風
禽颺天籟互鳴嘑
林薄山屏競蔚蔚
採杞擷芻薪水暇
吾從龐老興何窮

武林春日二絕

越羅初御柳煙深
慵病相從老見尋
酒罷塵盃膠燥吻
春無顧藉一分心

何人疊疊共揮塵有物娟娟散百花不向箇中吟蓓蕾
久晴風日漲塵沙

邵公濟求泰定山房十詩

下馬橋

泉下顏光祿二紀瞻馬首停驂肅松檟風節應不朽

邵公泉

源深派河漢感感尋常窄嗜芻借甘滋無涯君子澤

褒勸堂

易經傳父子前後弓帛賁衣鉢堂室中千古發潛秘

松門

畫局熟鹿守晨啟素鴉馴延陵掛孤劍吳月照峩岷

采薇洞

以心為形役徇人失天真蕨薇與杞蕘求仁始得仁

畫山亭

蟻封于何險醢雞豈必啣須彌一了亭中大然之

懷伊亭

龜雒儼如故玉靈誠有知歸艫帶江海澡濯我清伊

柳陌

輞川題作浪武昌栽屬官愛思如孔階茸髯擺竒觀

桃溪

懷仙津步翳凡聖隔兩塵長統植園菓老幼分甘珍

竹溪

側生昂九霄蕭森谷量輅谿嵐翠欲滴塵外嵇阮趣

避暑山寺二首

瓜瓠成時肆割烹，芰蓮相屬足逢迎。
掃寬堂廡無罨煩解，汲冷盆壺頰濯清。
畏景賢愚殊苦樂，涼飈徧灑不堪名。
倦禪謾許絺衣掛，秋朔逍遙竹几橫。

冷澈雞蘇水，踈涼蟬翼綃。
山林等袞燠，江浙劇枯焦。
陰暘恫生聚，吁霄訴次寥。
乾坤棊鬪劫，終局算虧饒。


六月不雨至七月中自寬一首

宿舂僅有憂將竭，嘉穗連雲委曠曷。
厦屋珍臺求暫寓，桃笙葵扇殆難當。
荷烝蘭藉肴谿澗，藕脆萍馨飯莽蒼。

龍火西頰已辰浹何時得見雨浪浪

千葉白浮蕖一首

嬌酣擬誰似韻甚莫為憐矧肯媚塵俗誠能降佛仙洗
君凡眼肉嗟汝淤泥賢三六馳顏侶盪舟從妬妍



雙溪集卷三

欽定四庫全書

集部

雙溪集卷

四至
六

詳校官右中允臣薩敏

主事臣呂雲棟覆勘

總校官進士臣繆琪

校對官原任典簿臣郭祚熾

謄錄監生臣連彭年

欽定四庫全書

雙溪集卷四

宋 蘇籀 撰

古律

僑居一首

忽忽五十化已往固莫及
祠官閭中隱歟歲尸糝粒毀
方非瓦合知白無伊鬱世
悅鄙駱駝我賢揚執戟浮雲
儻來寄最貴非儒術塵緣且
復且只爾殊易輯古人學
易年所愛豈兒劇

歲晏即事

磴霏白雪春雲子盤摘黃金割蜜房組織翻騰不停杼
芳甘醞釀饋先漿西成僅有儲困窄中土纔歸寔枕康
敕賜宗盟旌德剋扈陽珍木蔚葱蒼

連雨作寒二首

三五夕醞雨輕寒鼓腹朱儒恃縣官樵指汲肩親課督
僧籤禪榻謝雕鑽龕燈危藥挑停久編秩雌黃點黠乾
未許漢陰修渾沌周詩三百近研觀

未應牢杜敬通闕寄傲足怡元亮顏兀齷凡庸何異目
麓疎潦倒幸投閒平生那識賈三倍晚節猶窺道一班
調燮裁成真大治茂弘先進實非孱

擇鄰一首

天然齷駮千金子憬彼儉民亦有徒蹴踏惟應怯龍象
灌輸何足計餅盂神錐曾見汝潁士道韻也欣山澤癯
栗尾著書趨聖處老勤端恐負師模

才難一首

建安謀首先文若武德機神重伯襄此士不妨門第美
于今景仰太山高卓哉二賢強百萬何較九牛於一毛
異代愛才尊尚意紛紛姜腐見兒曹

何武翼挽詞

橫槩禡神佩追隨井鉞軍周旋圍徼最首虜驛書聞幹
權承心計汙邪續力耘門廬必高大訓子擴儒丈

簡常次立一首

文章塵粃懶詳論吏術麤蕪昧舊聞鈍憊康莊輸軼步

精強省寺稱公孫容吁國計神資略嘆惜戎容壯扞藩
吐吐書癡公事間蟬鳴官柳夢餘魂

朱亭伯改轉見過一首

三就可憐繁馬頭一鳴須信絕雞羣繫維才駿殊旌別
籍甚名聲奈耳聞浩渺池庭輩鴻鷺騰軒館殿擢蘭芸
相容歷稔逃詩債太白惟當浮勸君

守局一首

悠悠疎逸皮冠守朝著於何寘漫郎不計少多鳧藻汎

豈懷吞啄鶴軒昂
執輿投刺初
嫌閑視蔭言
歸久蹈常
飲酒讀書私務爾
渙然意喻伴言忘

觀閣梨庵高樹梅花盛發一首

懼儒花戒疇昔井眉
箴危綠擅丘壑攢叢
薈弁簪慙
懃時芳撥浪莽縱疎
森迴映晴空馥乘凌
陰霰任狂儔
縈栩蝶尤物富芳心
玉蘂真人馭鈴齋
水部吟燒燈助
斜月吹角伴橫參
樹下幽禪觀瓊蕤
政糝襟

退士一首

賢賢高哉古黔婁獨辦真趣肩夷由市朝慕誘吁競求
求仁丘壑良遠謀白雲抗志耕平疇炎天葛製冬鹿裘
邂逅孤豚笑肥牛撥刺廉魚脫金鈎雄雞曳尾憚俎羞
鷓鴣一枝綽餘麻楚楚奢靡黜蜉蝣下士閤然媚俗流
嗟嗟此病云何瘳淵源友尚顏軻儔襜褕有暇從菴韞
形為心役無深尤貂蟬夸說出兜鍪馬高蓋憂人憂
才殫力盡長不休上士凌霞宅巖幽千鎰鶴書那轉頭
祝舜俞少卿示曩歲葺蒙園陪游風什一編不

度枵踈上塵二首

清沂雩舞蹈前模風詠先生于為于論述殊堪露門召
鵠摩已化兔園儒臺評公雅銛鋒鐸杖齒袞遺抱筆觚
草木溉培裁畫暇忘憂蘭桂富芳芬

筮仕梧生繇莫京溫清一畝夙經營南陔絃誦給甘旨
北闕簪裾負屈聲秦刻唐刊儲墨妙齊衢魯廟擅文鳴
建安正始源流遠詳味風規躡玉清

夏日歎二首

羣空冀北食場稽感踏崔嵬憇鶴臺泉石係心終眇邈
炎蒸爍體縱恢胎蒂懷寓眼勤呵吐專氣怡神願力陪
公館亦須延異士珍包竒醞肆筵開

褫絺肆簟扇忘閒轎擔肩頰走市闌湫隘龜蜩謹嘒裏
掃除風月廣輪間曷云時燠長無冷却謂天高只好還
傳癖詞源粗超軼擬如梅尉樂吳山

休沐日

洗硯酬絨復論文金書瑤笈忌羶葷搔頭冷枕遺簪弁

澣垢涼床潔悅怱場竈篳門無量燠夏畦褐父若為芸
鴻飛遵陸搏寥廓鳥鶩胡然顧澗芹

覈實一首

窺見呂臣非奉已可憐甘茂取宜陽敢晞激激蘇門歎
老去悠悠孔里狂公利噫乎入私帑濫吹竊爾耗官倉
座銘枕机槃盂警九鼎何心片被甌

游服者二絕

墨綠螺青金翠耀彌謳沽笑泥娛遨茲辰儻卜吾髯夜

陶寫醉醒雙鳳嘈

畸情灰炆妙齡懷佳月澄虛適與偕隱几噓天嗒然趣
叅同九鎖啓仙階

園人餉菓

紫絳李楊盧杏黃紅腮脫碧磊篝箱春風媚世葩華過
夏日薦茶冰蜜嘗瓜步宅時邵平意木奴晚節李衡穰
君看釘坐百端輯腐蠹蕭然自弭忘

送程孚叟知歸州

建平

岷江浮萬里吳嶠駐彌年笑理歸艎去牢愁失眼前德
門桑梓盛佳郡鵲鷓聯委寄參羊陸宜知備敵先

東都人陸海游集若為忘筮史同微貨僧坊共小涼卜
鄰栖輦轂返旆促囊裝巽坎知人意奔騰達侍旁

山齋閒詠

仲氏新裁汝南諾元昆聊艤巨區舸一竿暇豫臨流賦
五詠荒唐處士歌道號散人宜拜表朝班都士好鳴珂
染髭膏面誠牽勉老矣迂疎可若何

徽宗皇帝挽詞二首

朔駕虞巡陟南沿禹會幽詒謀開上聖多事酌鴻猷道
妙仙心廓文昭帝作優秋風舊汾水海岱忽藏舟
大器提擎力懷生渥澤滂本枝繁盛衍禮樂懋容光脫
屣吁勤倦置郵辭慨慷申胥不為已定勝泣穹蒼

林少伊直院母夫人柳氏挽詞

英英批鳳傑遺懿誦高堂淑質宗姻慕慈憐壽凱康委
蛇矧夫子勤苦養尊章駒隙八旬促蘭陔愴隕霜

遐年昇東榻流慶羨停儲弔者九臯唳幽夫百歲居魚
軒川上逝石窳墓前書絕妙斯銘勒寧惟崔蔡如

聞鄰娃酣謳一絕

冶蕩淹媚誰爾令五陵妍駸可憐生蘭堂委巷喉呀嘖
信有秦聲非越聲

秋興一首

進賢譁玉青雲侶十二陽秋闕城府飛鳴衆裏何少多
根塹道旁誠李苦肅然注仰奎浮圖珍重誰家木居士

袖章陳列有倫叙終更右移聊改步貝多小品老耽伽
高屋帽簷持論古丹青簡素寫真行茗醞蒼牯頻草具
俸清不足賑貧交雨潦涉旬魚躍釜時書檄尾文昌臺
月曳敝裾槐棘府昔賢浩歌金馬門或亦簞瓢松菊主
空空自笑兩端竭志願不應惟阿堵初平兄弟羝眠所
山下逍遙返民畝大道安知利與榮唐彬何人高此舉

賦叢蘭一首

楚郢都梁竒韻佚嵐溪雲壑初何僻根蒂條芩玩九春

葩葉尖萌碧逾尺蕙轉東君溢寵光
露浥清華煙染色
菊翁勃天芬透綺疎英蕤綠艷揀
詩客滋榮九畹不因人
無際幽深來響屐三嗅書帷嘗涉獵
滿把騷人安忍釋
映俎垂筵紉委佩斲苔徙檻芳盈室
燥虛黏膩俗塵清
祛病析醒驅抑鬱猗猗不採亦奚傷
雍容屈宋無倫匹
賞慨年芳次第菲輕重憎憐從結習
辛夷為塢薜蘿門
莎萋蒲蘆類非一庭中絕出忘憂右
差等水仙誠莫逆
遙知最妙嶺頭梅適口和羹似難及
更與丘明評國薌

后皇媚之殊赫奕

次韻陪諸公湖上春游

渠儂青門道冶服遨蕩儔一醕逞雞鞠聯袂歌願儔太
伯表東吳季子居延州湖山號佳觀籃輿肆優游肴香
炙亦熟只有空罇憂娛賓不計費拘士捐牙籌詩盟得
首唱有客如此不挈壺并琴奕松石巖湍樂境勝屬幽
人谿雲俗氛却洞穴鎖蒼霞探竒或云莫不聞古肥遁
靜極還思家高情縻圭組心迹何由遐畸人告予言黃

庭老生涯減穀兩亡羊初平隱金華

次韻孫邦求少監游劉園一首

權使將軍勢不行連雲鴛鴦鳥晴池臺溢郭鑠局固
林樾半空薨拱頰席帽揚鞭來看鶴綺疎褰幌政聞鷺
賀蘭清海勛名事雅意未諧幽與并

勾龍君貺求所居垂蔭亭岷堂二首

葱蔚敬亭非索漠幾希陶宅遶扶疎江山壯觀惟人助
祖禰高情陟彼砮雄筆仙才鐫勒見屬車塵界默存書

柴荆雖掩漁竿掛旌戟差我表舊廬

岷陽英傑古賢鄉侍史香爐今望郎東擢欲書丹鳳詔
夢魂勤到碧雞坊已應盛美標其芬不比畸人愚厥堂
宦牒隨江歸碧海讀書源派亦誠長

眉州禪僧一首

吳蜀跨萬里余老師非壯勉哉令修行手書勞四枉性
命吾基本權譎初不尚蕭條寂寞中咄咄祛礙障面目
認誰歟湛研澈盡量云為遠玄旨比喻非實相愛河澄

不波苦海永無浪封執即黏綴淪落嗟滉漾法流於河
接焦涸吁斷港情塵欲忘世疑網愆吾黨凡心非道體
志帥凝不喪瞿曇與老君一訣歸至當邈乎盧老前古
初更遐想燒香儗霄極癡絕堅願望杳眇蓮社遠蚤接
淵明放保真未易了伽語席倚仗

刺少年行

重仍印組矜蟬睽豐屋藻井松栢挺金鈿翠屏珠串箔
椽燭高檠玳瑁筵熾紅麒麟沈水爐鳳紋錦褥須彌羶

瑣窗犀按街珍具瑤瑛紅珀瑩盃捲兒擲梟盧喝大采
婢名素玉花月煙驕世華腴詫豪舉兩得仁富宜兼全
朔雲顏巷積深雪斫桂燒金凍折弦毛錐不搖汗馬却
刻槌膚髓稱才賢法家拂士屹山峙俶然窮儒衢道邊
遙知莫不任運力鏃箬仰笑衝九天

永嘉周道人求詩一首

氣昇期汗漫世法一點婁啓鑰因師旨咀芝從祖求肆
言諧律呂不夢本精修王室金堂邇飄飄竹杖游

調王季恭省幹

治幹怪君呼滑八話言明府取王丞九臯未省山雌雉
三窟不逃秋角鷹僮鬻斛珠如許價官居鼎鉞最難勝
孰令手版投耕耒苦慕如湯厭若冰

示施又新同舍

華髮些些似不公辰申齷齪有何庸力拋羈絆片時適
談謔槃筵一笑烘山殺汲壺茶可點匠人礮斲事方叢
麥秋梅潤霖淫劇旅汎殊諳干越風

節婦吟

君不見迴妙殊憐世絕塵脫足褰帷韞玉人藕絲帖體
沈香熨清瘦纖柔傷九春勒芳戢翠妍無偶嘖嘖拳拳
徐叩叩潔餒何嘗羨汙飮今淑專貞絕難有綠樽翠杓
稽留舉林下閒情風韻度單羈拋擲幾星霜瑣卑脅脅
蓬茨伍里鄰數嘖詫又誇僮翁詎堪眉斧加想當然爾
霸勾踐豈埃再顧傾夫差雲霞攏抹振瓊璫藉穠蕙轉
婉清揚此翁南郭坐忘趣道眼不玷慵來粧

解罷京局一首

運水擔柴力分遭挾持
泥古小儒勞浙潮
屹起岷峨上越巘遮蟠
江海滔一葉鷗湍尋
嫠女半生瓢汎信魚
舸曩時瓜步從容侶
好糝藜羹待共輦

甲子歲七夕與伯業伯衍游龍井聰老出示次韻邊校理詩卷奉同雅趣一首借用嘖字

道隱祖風邈訥齋重葺
新猊巘下獸魅神泓躍
鱗鱗緇郎踵教律梵夾
畫金銀幾岸風篁幘屢
鈎崖峭紳頌詩

傳正眼擊節富其人漢沔曾淪碣長康工寫神思友在
封植春蘿容抗塵韡萼秀多禊茶瓜經幾巡休休墨儒
行汲汲宰官身欠伸白氎褥翻倒明璣困蒼褐嵐煙染
心脾草樹親憐君深鍛煉公鑒褻老嘖

秋夜雨涼一首

寸念微情浩莫緘此生殊闕住山庵老懷釣港伴侯喜
道契濤江見陸參調氣從前深造孟名官蚤欲問於郊
家書時燠何嘗讀整頓塵編拂白蟬

次韻趙德載大監餞行之什

君不見畢毛召芮強周宗亮天不朽言行功間平歆向
漢人望道宗孝恭唐治戎一時入相九才傑白賀胷中
五色茸聖朝舉親加東擢封植教誘從元豐蕪臯卑飛
華岳隼鼓車暫屈翔麟驄召還喻蜀監王國三雍入對
文清雄昨者臨分勤造請是時暑退火星中公瑾之交
似醇酎吉甫之頌如清風博山麝炷玉鎮席翠壁雪乳
金塗龍小人自分悠悠者裨謀野淵明窮急觴高詠

鼓英氣颯然危冠髮上衝端敏高明必貴達果信碩鄙
根中庸

送陳夢得省闈一首

棘闈春曉鑠南宮文柄伊人掌握雄巧射穿楊驚破的
克家長箭挾良弓懷經負笈雲霞集出手成盧月桂漿
玉殿賜袍黃紙詔布衣馳騫黑頭公

踈嬾一首

省寺周行占姓名老耽攝養道幾成生緣瑣屑同甕糞

居處閒靜惟餅筮求已洗心祛習氣知非窮理勇移更
鴻生彥士乖游好道秩禪流諧此情

題善草字者一絕

獐獵包羞爵秩加與人捧腹只呀呀踏搖妍狀當墟手
如許銀鈎殆可嘉

元夕

瑠璃萬寶通明殿珠翠千層卷畫樓匝地薰天月燈影
撼山填郭蟻蜂稠浚都平昔金鼈峙雍幕尋常錦憶游

今歲山城索朋侶屠門酒醞夥酣謳

春日郊外

蕙路桃谿浩莽春彤薨拱桷曜芳晨衣如方士客閒劇
園號儀同勢絕倫梓幄桂旂端解賦橘藩條塢孰為鄰
畦畦薑芋葵萋蓼物物蕃滋輔主人

飲東窗一首

丈夫蘊挾胃懷奇浩然幅鬱千虹蜺俚儒媿變習和雅
竊笑胡為鉗井湄奈何平世事蹇蹇奇士矯犖矜云為

伏波不屑兒女暱馬革自詭排羌夷叔子逢時經廟略
入則造膝出詭辭燕公異禮集賢殿筆削金泥玉檢儀
賈生前席覲宣室立談痛哭纔幾時敬通杜門老著述
言溢千紙罔設施骯髒黃冠遁丘壑一旦端委偕龍夔
愚生尚友千載後讀書探道無津涯猖狂置章留黼座
腐塵潦倒曾何裨世承朝恩萬鈞重省思此去酬毫釐
送蘇念八郎下第西歸梁益

金昌亭下泊舟壚木馬關西趙郡蘇建鄴魚飡武昌水

延陵臯壤霸王都
吾髯軒軼登樓賦
汝器切磨清廟瑚
刷羽三餘鴻鵠舉
亨衢甲乙看先驅

嬾阿一絕

不瑕彭澤願言中
都冶姿年慧則通
揭調郡齋賓孺子
嬾阿舊漿駐芳蹤

次韻李次仲赴巨山張舍人招贈之什

君無吟秋草螢飛
而露濕曼倩古豪
英羨門深杖拭五
難背生路九鑰探
金碧烏龍因師指
龜峯森郡戟張羅

候鳧影過客紛如織子房河上翁揮犀高讌席嗟呵棗
如瓜肉眼殊未識西母掬露醒東王漿霞赤至哉高尚
公著書不靳惜髻珠曩許學玉版援金筆仙階三洗髓
短生幾兩屐岌嶷法身像褻博烏沙憤焚沃覲有遭稽
首悲涕泣妙訣付神水悃誠如皎日升降摩頂踵抽添
而損益勞生息奔迫頽齡飛鳥急希求九陽聚何憚一
千夕近期赤水中先覩玄珠得

冬日即事一首

蠟炬五萬酬鞭直，泚統百金真。食封蒲散不萌爭，鬧趣
真醇繆覲養生慵。滌清研裏愁凡筆，磨澈鑑中頻窘容。
暘旱玄冥僭春令，狐裘羔酒貯嚴冬。

送孫丞法先池陽二首

糲粉里中契年輩，愧君先德邁華腴。喬才優若剗然牛
刀，恢勿擾馬首峻高遷。交薦諸侯鶚，藍田崔未賢。

一薰襟趣暱，捺執便它邦。書劒搖煙艇，鴻光醉綺窗。縣
僚迎節蓋，齋醞綴羊腔。器宇青雲士，能名賦練江。

李隱知名谷與青城劉翁同舟至蘭溪卿大夫
修生者館之道侶贈李詩云李郎涉世似虛舟
片帆來渡楚江秋之句又毗陵家第季文和此
篇云夢蝶豈知真是蝶騎牛何必更尋牛老夫
亦慕道者次韻和之記劉李事迹劉本書生工
詩奇異飄然塵外也

白公枉識郭虛舟劉李飛符袒劍裘興軼壺中身混世
氣酣酒裏意橫秋運調朱鳳啄白石耕蒔金錢掣牯牛

赤子返真標指妙阿伽陀藥肯言不

劉吐丹千百粒示人
遭毒藥不能傷害

韓省幹子平薦章應格朋友漠然未知忽改京

秩作七言近體一首賀之

山雌澤啄競騰軒孰有昂駒局短轅造物至公殊弗置
窮交未喻枉焦煎鳳批一諾膺天陟馬頸三槃朝日邊
虎鼠獐虺隨秉筆銓曹常格勿從旃

縣扇偶吟一首

拏雲擘繭寫蘭亭泚統娃宮簔柄成皎潔中規指月斧

清雄消暘並桃笙玉毫躔內乘鸞女冰鑑光中墨客卿
愛惜御冬充便面辟寒撫勉燠屯營

卜居遣興一首

老嬾清吟口角鈐任真虛一性安恬士農軌範一身任
孔老窮探兩者兼齋舍晦晨雞弗已翱翔晚節蔗彌甜
平生綠業今何憾佇返神魂倍蓰添若箇生涯論屋穀
課催童子具醪鹽俊游稍謝出囊頰道念常嗤隔日疴
擬古紕疎何柳骨攝生精密必張髯鶴軒發興從譏晏

鴈塔乘時定合尖

張翥方士也

卜居漫賦

肄習素未豐，摸索強剗裁。銖黍驟聞見，諄吃奚述哉。三捷黜疎慵，湛潛散郎偕。望道幾何高，人事寧免乖。眼中悠悠者，樵牧供談諧。披卷想前芬，骯髒無敵才。功名不復朽，榮觀竟煙埃。幽疇人居黃花薦，醪醕所求一日富不足。語時儕，寄言繁華侶，莫嗤鈍如槌。

叅雲亭納涼小集二首

設醴茲晨邀飫時四圍青峭互巖嶷橐衣隨牒何曾卜
餌藥銜盃稍信醫短舞不妨擊齒菡萏談諧且勿負玻瓈

老夫直轡循吾範無使斯民有以窺

退之用
頗黎字

踽踽迂疎彼一鰥息交絕學殆頑顏時儕儻獲多謀助
少作曾希長者刑餵犬孱厓玩逋竊轅駒牽跼曠尤瘵
那無上術蠲人瘼畫戟臨江城負山

後數朝復依前韻二首

下國官臣無懈時矯然白首矚欽疑鼠攘翦滅雷霆令

魃虐蕭騷霈澤醫廉袴移文謹鈴鍵蕭齋絲管覆玻璃
燭闌松桂冥冥霧赤豹丈狸不許窺

恤患周流喜逮鰥當官掣肘汗慙顏預虞飄兀後能駕
取次耕犁手欲刪月窟日畿遵驛置燕南越北洗恫瘝
一廛清佚陶元亮萬斛閒愁庾子山

仲秋較試淨惠精舍會者六人約重九事畢置
醴湯鞏謝方以詩堅約次韻酬之

稷下銖銖鑿擇分品評一目百知聞初矜月殿揮毫賦

直到龍山吹帽文邀勒公榮狎嵇阮薰塗媵侍淵雲
塵驚珠貫織羅襪吠酒銀篋不怕醺

試闈即事三絕

鼓士揚桴警五更曩清禁冷旋吹生深衣鄉彥都君子
摩厲三秋銜此行

近歲頡門不讀書右文搜拔廣該儒立言不朽非吾任
貪叩玄門隱者廬

一坐據梧床刃消五星競耀燭秋宵掃廳禁近延僧孺

孰謂詩書避賦繇

事畢湯鞏方三君再用前韻復酬一首

妙啜龍團香少分寶薰婆律靳多聞
泥封謄識遵程度
棘刺圍藩按惠文
按菊騷人寧避雨
登樓朝彥氣摩雲
蘭堂錦瑟笙篁鬧
嬉笑啁謳共惜醺

雙溪集卷四